


Edita Bešlija, edita.beslija@aldi.ba

SAOPŠTENJE ZA JAVNOST

Vlasti u Bosni i Hercegovini u svim oblastima blokiraju proces EU integracija čime jasno pokazuju da njihov interes nije ulazak u Evropsku uniju. Vlasti Bosne i Hercegovine od početka 2006. godine do danas nisu uspjele ispuniti dvije trećine uslova koje je Evropska unija postavila u prioritetima i uslovima Evropskog partnerstva, od kojih je pokretanje reforme policije samo jedan od 72 neispunjena ili nedovoljno ispunjena uslova.

Goražde, 07. novembar 2007. Objavljivanje Godišnjeg izvještaja o napretku Bosne i Hercegovine u procesu EU integracija za 2007. godinu i prijedloga odluke Evropske komisije o dopuni prioriteta i uslova na putu ka članstvu u EU, pokazuje da ispunjavanje uslova koje postavlja Evropska unija nije uopšte prioritet za domaće vlasti. Iako u medijima lideri vladajućih političkih partija nastoje prikazati njihovu potpunu predanost cilju da Bosna i Hercegovina ubrzano postane nova članica Evropske unije, opravdavajući zastoje u EU integracijama političkim problemom u vezi reforme policije, rezultati ispunjavanja uslova koje je postavila Evropska unija govore da vlasti Bosne i Hercegovine nisu imale "političku saglasnost" za čak 72 od 108 uslova koji su u januaru 2006. godine postavljeni od strane Evropske komisije, od kojih je samo jedan reforma policije.

Grafikon: Neispunjeni i djelimično ispunjeni uslovi Evropske unije



U odnosu na prioritete i uslove iz Evropskog partnerstva iz 2005. godine u kojem je Evropska unija postavila 108 uslova, u novoobjavljenom prijedlogu dopune Evropskog partnerstva za 2007. godinu nalazi se čak 40 uslova koji su nepromjenjeni iz 2005., dok su 32 uslova samo djelimično modifikovana što govori da ukupno 72 uslova domaće vlasti nisu uspjele ispuniti u roku od 2 godine.

Činjenica koja najviše zabrinjava, a o kojoj je i javnost najviše upoznata jeste da vlasti Bosne i Hercegovine čak **pet od šest ključnih uslova** koje je postavila Evropska unija nisu ispunili i to: puna saradnja sa Haškim tribunalom, reforma policije, reforma javnih emitera i javne uprave i osiguranje postojanja istinskog unutrašnjeg tržišta.

Pored katastrofalnih rezultata u ispunjavanju ključnih uslova, dodatno zabrinjava da vlasti Bosne i Hercegovine nisu ispunile više od 60 procenata uslova iz kategorije **političkih kriterija**, odnosno čak 17 od 28 uslova. Ovaj podatak posebno zabrinjava jer su ovo uslovi koji su trebali obezbijediti stabilnost institucija koje garantuju demokratiju i vladavinu prava, ljudskih prava i zaštitu manjina. Niti jedan uslov u vezi Ustava nije ispunjen čime nije napravljen nikakav napredak prema stvaranju funkcionalnije državne strukture, dok je ostvaren samo ograničen napredak u povećanju administrativne efikasnosti Parlamentarne skupštine Bosne i Hercegovine, a vlada na državnom nivou nije sposobna da prevaziđe unutrašnje konflikte. Posljedice neispunjavanja obaveza postavljenih pred parlament i vladu trpe u potpunosti građani, što se može i vidjeti po tome da su pet od šest prioriteta u oblasti **unaprijeđenja ljudskih prava i zaštite manjina** potpuno zanemareni od strane domaćih vlasti.

Zahvaljujući prvenstveno uspješno provedenim reformama pod vođstvom međunarodne zajednice, u oblasti **ekonomskih zahtjeva** je ostvaren najbolji napredak u procesu EU integracija, na način da samo jedan od deset uslova Evropske unije iz 2005. godine nije u potpunosti ostvaren i da su tri uslova samo djelimično ostvareni, što daje pozitivan signal da Bosna i Hercegovina i pored političke krize može uspješno ispunjavati ekonomske uslove Evropske unije. Međutim, znatno je veći problem u dijelu uslova koji se odnose na **unutrašnje tržište** gdje su vlasti Bosne i Hercegovine ispunile u potpunosti tek 2 od 18 uslova Evropske unije, dok je nešto bolji rezultat u uslovima iz sektorskih politika gdje je od 46 uslova 16 potpuno ispunjeno. U dijelu uslova koji se odnose na **pravdu, slobodu i sigurnost**, vlasti Bosne i Hercegovine su postigli sličan rezultat gdje su osam od 13 uslova u potpunosti ili djelimično ispunile.

Dodatno ohrabrenje iz Brisela

Najnovija lista prioritata dostavljena domaćim vlastima iz Brisela, u obliku revidiranog Evropskog partnerstva, pored toga što indirektno govori o dosadašnjim rezultatima koje su postigle vlasti Bosne i Hercegovine na putu ka EU, daje listu dodatnih prioriteta i uslova koji prije svega pokazuju značajno pomjeranje fokusa Evropske unije na zahtjevanje rješavanja ekonomsko-socijalnih problema koji su prepoznati od strane građana kao pitanja koja moraju biti stavljena na vrh ljestvice političkih prioriteta. U modifikovanom Evropskom partnerstvu EU je postavila novi 61 uslov što govori da u naredne dvije godine pred domaćim vlastima stoji ispunjavanje ukupno 133 uslova. Početak insistiranja Evropske unije na ekonomsko-socijalnim pitanjima dodatno ohrabruje građane Bosne i Hercegovine da je EU i dalje snažno zainteresovana za ubrzano približavanje Bosne i Hercegovine Evropskoj uniji i pored činjenice da domaće vlasti blokiraju proces EU integracija u skoro svim oblastima.